



UPA 2017/19
Nuuk, 20.04.2017
BEBK

Uunga siunnersuut: Nunanit allanit aningaasanik taarsigassarsinissaq pillugu Inatsisartut inatsisaata atorunnaarsinneqarnissaanik Inatsisartut inatsisaat nr. Xx, xx. Xxx 2017.

(Inuit Ataqatigiit siullermeerinninnermut oqaaseqaataat)

Nunanit allanit aningaasanik taarsigassarsinissaq pillugu Inatsisartut inatsisaat nr. 13, 28. Oktober 1993-meersoq atorunnaarsinneqassasoq Naalakkersuisut inassuteqarput.

Naalakkersuisut Inatsisartunit imaluunniit Aningaasaqarnermut Akileraartarnermullu Ataatsimiititaliamit akuersisitseqqaaratik kr. 1.900.000.000,- (1,9 mia.) taarsigassarsinnaanerat Inatsisartut inatsisaata pineqartup periarfissippaa, tamannalu pisariaqarsimavoq nunatta karsiata akiitsoqarnerata nalaa-ni. Ukiulli makku atukkagut allanik unammilligassaqaarfiusut qissimikkutsigit inatsit maanna atuuttoq pissutsinut naleqqukkunnaarsimasoq Naalakkersuisut isumaqarput. Naalakkersuisuttaaq isumaqarput Namminersorlutik Oqartussat taarsigassarsiariniagaat suulluunniit Inatsisartunut imaluunniit Aningasaqarnermut Akileraartarnermullu Ataatsimiititaliamut saqqummiunneqaqqaartarnissaat nalornissutissaajunnaarsimasoq, tassuunakkullu Inuit Ataqatigiit isumaqataavugut.

Inuit Ataqatigiit suliap aappassaanneerreqannginnarani pisariaqartutut isigaarput Naalakkersuisut nunatta avataanit aningaasanik attartornialersillugit atugassarisaasut eqqarsaatigalugit Inatsisartunit ersarissumik piumasaqarfigineqartariaqartut. Isumaqarpugut aningaasanik attartorniarnermi atugassarisaasut tamakkiisumik qulaajaqqaarlugit Aningasaqarnermut Akileraartarnermullu Ataatsimiititaliamut qinnuteqartoqartanissaa qulakkeerreqassasoq, pingaartumik erniat qaffasippallaartumik inissinneqartannginnissaat innuttaasunullu akiligassanngortinneqartannginnissaat qulakkeerumallugu.

Taamak oqaaseqarluta suliaq aappassaanneerreqannginnarani Aningasaqarnermut Akileraartarnermullu Ataatsimiititaliamut suliassanngortinneqassasoq inassutigaarput.

Qujanaq.

